

雪
堂
叢
刻

卜子年譜自叙

天地有牖民之心而不能言聖人代之言六經者聖人之言實
天地之心也無六經則聖人之言不可見即天地之心亦無由
見矣天地之愛護六經也與愛聖人同有能抱守遺經於湮晦
之餘者天必況施神明之壽以繇衍聖人之緒於不墜故伏生
轅固生皆秦時人至漢文景時年九十餘而尙存竇公爲魏文
侯時人至漢孝文時年百八十歲而尙存卜子爲定哀時人至
魏文侯時年百有餘歲而尙存無他存伏生以存書也存轅固
生以存詩也存竇公以存樂也存卜子以存羣經也此亦可見
天地之心矣當孔子歸與發歎還轅闕里與羣弟子論次詩書

修起禮樂及門之士身通六藝者七十有二人其時儒術號稱
至盛未幾兩楹夢奠素王告殂其有散遊諸侯訓聚徒衆如曾
子居武城子張居陳子貢居齊澹臺滅明居楚並相繼淪逝不
可復作下逮戰國之世六籍益替九流並興至聖微言不絕如
縷獨賴卜氏以期頤上壽而又值好古賢君傳布經學爲海內
大師俾東山之緒復振於西河其功固不在鄒嶧下也今試卽
其功詳言之爾雅子夏所足張稚讓言之論語子夏所譔鄭康
成言之論語崇爵讖亦云子夏等六十四人共譔仲尼微言惠
氏棟謂卽論語也於易有傳於詩有序於禮有喪服傳有夏小
正傳有易本命篇於樂則論今樂古樂之別暢發其旨於魏文

侯於書亦有發明章句之功見於後漢徐防所言於詩則授高
行子或云以詩授曾申由是而李克而孟仲子而根牟子而孫
卿子至漢遂有大毛公小毛公之學春秋則授公羊氏至漢遂
有胡毋生董仲舒之學春秋又授穀梁氏至漢遂有江公蔡千
秋之學吾嘗謂無曾子則無宋儒之道學無卜子則無漢儒之
經學宋儒之言道學者必由子思孟子而溯源於曾子漢儒之
言經學者必由荀毛公穀而溯源於卜子是孔子爲宋學漢學
之始祖而曾子卜子爲宋學漢學之大宗也又嘗謂羣經之置
博士不始於漢而始於魯魯有博士

史記循吏傳公儀休爲魯博士以高第爲魯相繆

公之爲也孔子之功也爲博士置弟子不始於漢而始於魏魏

有博士

漢書賈山傳祖父祛爲故魏博士弟子師古曰六國魏也

文侯之爲也卜子之教也

昔胡仔譔孔子編年江氏永作孔子年表馬氏驢繹史有先聖

年譜夏氏洪基鄭氏環蔡氏斨孔皆有孔子年譜而於卜子未

有譜其年者蒙嘗引以爲憾歲在重光單闕爰有卜子年譜之

編或謂卜子少孔子四十四歲雖見家語及史記仲尼弟子列

傳而公羊穀梁春秋謂孔子生於魯襄公二十一年史記謂孔

子生於魯襄公二十二年主公穀則孔子於定公元年四十四

歲子夏當生於定公二年主史記則孔子於定公二年四十四

歲子夏當生於定公三年孔子生年先不可定子夏生年曷由

定乎予謂公穀雖受經子夏其時皆口授未著竹帛至漢始各

有傳於襄二十一年經記庚子孔子生此非魯史之舊亦非孔子所自書特漢儒傳經者增益以尊至聖爲左氏春秋所無而史記魯世家孔子世家及十二諸侯年表云孔子生於襄公二十二年實有所本金哀宗時有孔元措者上承其先孔宗翰所撰家譜孔傳所作祖庭雜記之舊增益纂輯成祖庭廣記內引世本有云魯襄公二十二年冬十月庚子孔子生攷世本與國語並成於左邱明說見漢書司馬遷傳贊史記記孔子之生於襄二十二年據左氏世本記孔子之卒於哀公十六年夏四月己丑則據左氏之續經也夫羣言淆亂必折衷於聖人主公穀與史記者雖各數十家而

大清一統志從史記

欽定歷代紀事年表亦然而

欽定春秋傳說彙纂折衷朱子兼採夏氏洪基之說斥宋濂力
主公穀之非可以息羣喙而衷一是今遵史記以定孔子生年
卽孔子生年以定子夏生年不亦可乎所惜者其卒年未能考
耳然據史記魏世家文侯二十五年受子夏經藝其時子夏年
已百有八歲上距孔子卒歲已八十年矣一老耄遺六籍弗墜
謂非天之重愛斯文也乎今編卜子年譜始於周敬王十三年
卽魯定公三年終於周安王二年卽魏文侯二十五年以年爲
經以事爲緯纂輯彌月成書兩卷唯家鮮卷軸居久離索或漏

或舛鈞不免焉嗚呼坤純陰而有龍戰剝五陰而有碩果今雖
太蒙勢勦神州威斂邪詖淫遁之說奇袞譎觚之徒飈起雲合
將拔我漢宋兩家之幟然亦必有如卜子竇公伏生轅固生其
人以抱守遺經爲尼山之鄧林者雖窮巷蘧廬門徒三五亦可
作隱泉石室觀矣西河有靈當有聞予言而破涕爲笑者也是
爲序

其德果許至國客而何事無不承順乎其德而後能美其德者
 人思節孝至孝至德出之昭林者猶原孝義門封三正後何
 德也哉其家兩家之鄉德也孝德孝子夏公外坐華國主其
 次德也其德也其德也其德也其德也其德也其德也其德也
 其德也其德也其德也其德也其德也其德也其德也其德也

士之能立身修己憲章前哲者必其無忘前人所論著而不悖師之本旨者也則小子鸞有深媿焉光緒甲辰小子鸞游學顧穆之先生之門先生詔鸞曰吾鹽惕庵陳先生江淮間大師也論著至多自後樂堂文鈔刊行外有若爾雅釋例毛詩異文箋卜子年譜等稿皆爲希世之作鸞竊誌之乙巳春穆之先生逝陳先生率門弟子如千人來弔撫棺慟哭維時鸞始獲識先生面是年冬先生有粵遊越明年歸感疾卒於家鸞聞痛甚歲己酉鸞以事之滬與建業江楚間學士大夫遊每道及先生名靡不悲其遇而景其學甲寅夏先生姪鐘凡自燕京來謀刊先生遺稿未幾以卜子年譜兩卷至附函謂此書序言曾載國粹學

報第五十五期順德鄧秋枚跋尾云鹽城陳君以孤貧特立發
名海濱此年譜自序一首李君寄余先刊報中年譜之學貴能
排比事類廣集左證雖有不合其相距亦不甚遠有求勝之者
惟顯有證據始能更之況卜子遠在周世所恃僅經史輿地之
書蒐集最錄尤屬不易陳君於此幾經探索始有初稿後據他
書改定鈎乙跨勒跡如亂絲復審正而出始付繕寫先印此序
亦可見陳君學術之大凡云云當時讀者頗以未窺全豹爲憾
今商請羅叔言先生以全帙校勘鋟梓俾世之識先生者得益
明先生之學而小子鸞亦可稍告無罪於無忘前人所論著而
不悖師之本旨焉乙卯正月鹽城印鸞章謹識

卜子年譜卷上

鹽城陳玉澍撰

甲午 周敬王十三年

魯定公三年

卜子生於溫

史記仲尼弟子列傳云卜商字子夏少孔子四十四歲家語
同十二諸侯年表魯周公世家孔子世家皆云魯襄公二十
二年孔子生左氏襄三十一年傳注仲尼以二十二年生哀
公十六年傳注同王子年拾遺記周靈王立二十一年孔子
生於魯楊烟盈川集遂州長江縣先聖孔子廟碑夫子周靈
王二十一年冬十月庚子生孔子四十七世孫孔傳東家雜
記先聖誕辰周靈王二十一年庚戌歲卽魯襄公二十二年

也冬十月庚子日先聖生案孔子生於周靈王二十一年庚戌下至周敬王十二年癸巳四十四歲子夏少孔子四十四歲是生於敬王十三年甲午即春秋魯定公三年也胡仔孔子編年繫其生於定公二年是少孔子四十三歲也說非是今本史記不言子夏何國人家語以爲衛人鄭康成則云溫國卜商藝文類聚六十四文選左太冲招隱詩注並引尙書大傳子夏對夫子云退而窮居河濟之間考春秋傳說彙纂溫縣故城在懷慶府溫縣西南三十里考其地正當河水之北濟水之南與河濟之間正合司馬貞史記索隱云溫國今河南溫縣元屬衛故錢坫論語後錄云漢書地理志溫故國

屬河內郡河內衛地故家語以爲衛人此二說均未當溫本東周畿內蘇子國爲狄所滅狄不能有地歸於周魯僖二十五年襄王以賜晉文公晉以狐溱爲溫大夫左氏定八年傳晉成何曰衛吾溫原也謂衛僅比晉之溫原二邑非謂溫原二邑爲衛地也索隱說非是今河南衛輝懷慶二府皆漢河內郡地始封之衛有河內之汲州共朝歌等縣最後之衛有河內之野王一縣非河內皆衛有當子夏時朝歌等縣已入於晉桀王亦未爲衛有無論溫邑論語後錄之說亦非溫爲晉地子夏在春秋時爲晉人三家分晉溫屬魏故子夏又爲魏人文選李蕭遠運命論子夏升堂而未入於室退老於家

魏文侯師之正謂魏爲其家所在禮記檀弓正義引仲尼弟子列傳子夏姓卜名商魏人也復云子夏魏人也在西河之上然則唐本史記有魏人也三字而今本脫之鄭氏云溫國卜商與史記魏人之說正合宋高似孫史畧言江南史記爲唐舊本有字多者有字少者與今本同異凡四千三百五十條孔穎達所見史記有魏人也三字蓋唐本也今本無此三字蓋宋本也太史公作仲尼弟子列傳皆本弟子籍最爲可據今從之經典釋文序錄云子夏衛人太平寰宇記河南道濮州人物有卜商河北道衛州人物復有之皆本家語禮記樂記正義引馬昭云家語王肅所增加然則據家語遠不如

據史記矣

乙未十四年 魯定公四年 卜子二歲

丙申十五年 魯定公五年 卜子三歲

丁酉十六年 魯定公六年 卜子四歲

戊戌十七年 魯定公七年 卜子五歲

己亥十八年 魯定公八年 卜子六歲

庚子十九年 魯定公九年 卜子七歲

辛丑二十年 魯定公十年 卜子八歲

壬寅二十一年 魯定公十一年 卜子九歲

癸卯二十二年 魯定公十二年 卜子十歲

甲辰二十三年

魯定公十三年

卜子十一歲

乙巳二十四年

魯定公十四年

卜子十二歲

金鶚求古錄禮說云子夏少孔子四十四歲此不可信夫子去魯時年五十六如子夏少孔子四十四歲則此時止十二歲而陳蔡相從子夏與焉則去魯時其年必不止十二也古之四字皆積畫易譌四當爲三之譌也案金氏說非是據史記孔子世家孔子由大司空爲大司寇季桓子受齊女樂遂去魯事在定公十四年時子夏十二歲據魯世家衛康叔世家十二諸侯年表事在定公十二年時子夏才十歲無論十歲十二歲其時已從學與否皆不可考安知有相隨去魯之